

23/08/2000

Penduduk China semakin minat

PENUBUHAN Pusat Bahasa Melayu (PBM) di China di bawah sokongan Kerajaan China dan Malaysia, tiga tahun lalu berjaya meningkatkan minat masyarakat China mempelajari bahasa Melayu.

Prof Wu Zongyu dari Beijing Foreign Studies University (BFSU), berkata sejak wujudnya PBM, ia aktif dalam aktiviti bahasa Melayu di Beijing termasuk menjemput pegawai diplomat Malaysia berceramah.

Katanya, pensyarah dan pelajar BFSU sering mengikuti aktiviti perayaan di Kedutaan Malaysia dan Brunei Darussalam di Beijing.

Bercakap dalam Sidang Eksekutif Majlis Antarabangsa Bahasa Melayu (MABM) di sini hari ini, Prof Wu Zongyu berkata, tahun lalu sempena ulang tahun ke-25 penubuhan hubungan diplomatik China-Malaysia, PBM menyusun buku kumpulan ceramah Perdana Menteri, Datuk Seri Dr Mahathir Mohamad.

Pada tahun ini, BFSU bekerjasama dengan Dewan Bahasa dan Pustaka mengadakan Seminar Antarabangsa Perbandingan Sastera dan Pemikir Melayu/China dengan hampir 50 peserta menyertainya.

Prof Wu Zongyu berkata, pensyarah Bahasa Melayu di China adalah pencinta bahasa itu dan yakin bahasa Melayu mempunyai keunggulan sendiri jika dibandingkan dengan bahasa Inggeris.

"Sistem sebutan bahasa Melayu lebih jelas, senang diterima. Apabila melihat sepatah perkataan bahasa Melayu, kita boleh membacanya asalkan kita sudah menguasai sistem ejaannya," katanya.

(END)